

Ysgol Llanystumdwy

Llanystumdwy, Criccieth, Gwynedd, LL52 0SP
Ffon/Phone: 01766 522961
E-Bost/E-Mail : CathrynDavey@gwynedd.gov.uk
Pennaeth / Headteacher : Mrs Cathryn Davey BA



Annwyl rieni,

Croeso i chi i'r Blynyddoedd Cynnar a croeso mawr i chi ac i'ch teulu i Ysgol Llanystumdwy. Gobeithio y cewch flynyddoedd hapus yn ein cwmni. Edrychwn ymlaen i gyd-weithio â chi er lles a datblygiad eich plentyn a rhannu addysg eich plentyn mewn partneriaeth â chi.. Mae dechrau yn yr ysgol yn brofiad arbennig a'n nod ni fel staff yw sicrhau bod y cam o'r cartref i'r ysgol yn un hapus i'ch plentyn chi.

Gobeithiaf y bydd y llyfryn hwn, sy'n esbonio ein amcanion yn y dosbarth meithrin, o fudd i chi.

Yn gywir,

Cathryn S Davey

**'Mae plant yn dysgu mwy yn eu pum mlynedd gyntaf
nag ar unrhyw adeg arall yn eu bywyd!'**



Amser:

Oriau'r Meithrin: 1pm-3pm. Mae croeso i chwi ddod i mewn i'r ysgol gyda'ch plentyn i'w helpu roi eu côt ar y peg ac i deimlo'n gartrefol. Rydym yn awyddus i'w hannog i ddod i mewn i'r adeilad a rhoi eu côt ar y peg yn annibynnol mor fuan ag sy'n bosib. Erbyn iddynt ddod i'r ysgol yn llawn amser maent yn berffaith hyderus yn gwneud hyn eu hunain. Bydd y rhieni yn disgwyl i'r plant tu allan i'r giât am 3 o'r gloch i aelod o'r staff eu trosglwyddo yn ol i'ch gofal.

Meithrin Mwy Llanystumdwy

Mae Cylch Meithrin Llanystumdwy yn cael ei gynnal yn y Neuadd Bentref o 9-11am, yna mae Clwb Cinio yn cael ei redeg o 11am-1pm gyda'r plant yn cael eu danfon i'r ysgol erbyn 1 o'r gloch yn barod at sesiwn y prynhawn. Os ydych am fwy o wybodaeth am y gwasanaeth yma yna cysylltwch a Rhian Williams ar cylchmeithrinllanystumdwy@gmail.com neu 01766 523741.

Dillad:

Rydym yn awyddus iawn i blant wario rhan fawr o'u hamser yn cael eu haddysgu tu allan drwy'r Cyfnod Sylfaen felly mae gofyn iddynt gael cotiau ac esgidiau glaw yn yr ysgol yn barhaol.

RYDYM YN HOFFI GWELD VELCRO!! Mae carrau esgidiau yn anodd i blant meithrin. Hefyd, gall damweiniau cas ddigwydd o'u herwydd. Mae'r staff o gwmpas ond allan nhw ddim bod ym mhobman ac yn y lle cywir ar yr amserau cywir bob tro. Gofalwch bod enw clir ar bob eitem o ddillad os gwelwch yn dda. Bydd y disgyblion yn tynnu eu dillad weithiau ac os nad oes enw arnynt, maen nhw'n siŵr o fynd ar goll. Mae didoli 20 o siwperi glas yn dilyn gwers addysg gorfforol yn waith torcalonnus os nad amhosib !

Cysylltu a'r ysgol:

Mae croeso i chwi ddod i sgwrsio gyda'r pennaeth neu'r athrawon ar unrhyw adeg ond gofynnwn i chi wneud apwyntiad am sgwrs hirach gan fod staff yn dysgu y rhan fwyaf o'r amser.

Mewn argyfwng, cysylltwch â'r ysgol cyn gynted ag sy'n bosib os ydych yn mynd i fod yn hwyr yn casglu eich plentyn fel nad oes rhaid iddo/i boeni.

Os ydych yn newid eich trefniadau casglu, cofiwch fod rhaid rhoi gwybod i'r ysgol drwy alwad ffôn neu lythyr.

Meddyginiaeth:

Gofynnwn i chi beidio a danfon 'antibiotics' i'r ysgol gyda'ch plentyn. Ceisiwch amseru'r dosau o gwmpas sesiynau'r ysgol. Rhaid trafod unrhyw feddyginiaeth arall gyda'r athrawes.

PARATOI EICH PLENTYN I FYND I'R YSGOL

Amser Ty Bach:

Er ein bod yn gwerthfawrogi y gall damweiniau ddigwydd weithiau, rhaid i'r disgyblion fod wedi eu hyfforddi i ddefnyddio'r tŷ bach cyn cychwyn yn y Dosbarth Meithrin. Os bydd damwain, caiff eich plentyn ei newid mewn modd llawn cydymdeimlad ac yn ddiffwdan. Caiff y dillad gwlyb eu doddi mewn bag plastig a bydd eich plentyn yn cael dillad glan sbâr o stoc yr ysgol ac mae croeso iddo/i ddod a dillad isaf sbâr mewn bag i'w gadw ar eu bachyn. Gofynnwn i chi olchi'r dillad a'u hanfon yn ôl atom cyn gynted ag y gallwch os gwelwch yn dda. Caiff y plant eu hannog i dynnu'r 'flush' ac i olchi eu dwylo wedi defnyddio'r tŷ bach rhag i'r germau ledu a'u gwneud yn sâl. Gwerthfawrogwn bob ymdrech i gadarnhau'r egwyddor hon yn eich cartrefi fel bod yr arfer yn dod yn naturiol i'r plant.

Ymddygiad da:

Bydd dechrau'r ysgol yn brofiad hapusach os gall eich plentyn wneud ffrindiau a rhannu teganau.

Anogwch eich plentyn i fod yn annibynnol:

- wrth fynd i'r tŷ bach
- wrth olchi a sychu dwylo
- i adnabod ei got/chot
- wrth roi teganau a llyfrau i gadw

Bydd pob oedolyn sy'n dod i gysylltiad â disgyblion y Blynyddoedd Cynnar yn arddangos enghraifft dda drwy drin ei gilydd a'r plant gyda charedigrwydd a pharch. Bydd y disgyblion yn cael eu hannog i drafod eu teimladau. Cant eu harwain i ddelio â'u rhwystredigaethau a'u tymer ddrwg mewn modd cadarnhaol bositif. Bydd y disgyblion yn dysgu cwrteisi gan ddweud " Os gwelwch yn dda" " diolch" bob amser. Bydd y disgyblion yn dysgu edrych ar ôl eu teganau ac offer, eu trin yn ofalus a bod yn gyfrifol am ddychwelyd eitemau i'w lle priodol ar ôl gorffen chwarae. Os bydd ymddygiad plentyn yn ddrwg iawn neu'n beryglus, bydd y staff yn gofyn iddo/i eistedd allan o'r weithgaredd a chymryd amser i feddwl yn dawel am ei ymddygiad ac i ymddiheuro os bydd angen. Os bydd ymddygiad plentyn yn achosi pryder, byddwn yn ei drafod gyda chi yn breifat cyn gynted â phosib.

Disgyblaeth:

Bydd disgyblaeth yn y dosbarth Meithrin yn gadarn ond teg a chyson. Daw plant i'r dosbarth Meithrin gydag ystod eang o batrymau ymddygiad ac mae pob plentyn bach yn dueddol o fod yn hunanganolog. Mae plant yn aml yn cweryla ac yn dweud " dydy e/hi ddim yn ffrind i fi". Mae hyn yn rhan naturiol o ffurfio perthynas a'i gilydd- a fydd yn parhau trwy eu hamser yn yr ysgol ac ymlaen i fywyd fel oedolyn. Gawn ni eich hatgoffa bod dwy ochr i bob stori- a chofiwch fod plant bach yn hunanganolog fel y dywedwyd o'r blaen. Os daw eich plentyn gartre yn cwyno am blentyn arall ac yn poeni am hyn, dewch i drafod hyn gydag aelod o'r staff. Mae'n debyg y gallwn ddatrys y broblem yn hawdd drwy ymyrryd yn gynnar.

Rydyn ni am i bob plentyn fod yn hapus yn y dobarth Meithrin. Yn y dosbarth Meithrin, anogwn sgiliau cymdeithasol positif o rannu a chymryd eu tro. Erbyn i'r plant adael y Meithrin gobeithiwn y byddant yn gallu chwarae yn gydweithredol gyda'i gilydd. Rhowch wybod i ni o flaen llaw os oes gan eich plentyn broblemau ymddygiadol, yn enwedig os all frifo eraill drwy eu bwrw, eu cnoi, eu crafu, eu cicio ac ati. Gyda thriniaeth gadarn gallwn delio â'r ymddygiad o'r cychwyn cyntaf, ond mae angen eich cydweithrediad a'ch cefnogaeth arnom.

Dysgu trwy chwarae:

Defnyddir chwarae fel mynediad i bob maes dysgu. Mae'r disgyblion yn dysgu'n llwyddiannus gyda mwynhad. Trwy arwain gofalus a chwarae strwythedig bydd y staff yn defnyddio llwyddiant plentyn i gyflwyno a datblygu syniadau newydd. Cynllunnir cyfleoedd ar gyfer pob math o chwarae gan y staff a chaiff y disgyblion chwarae'n unigol, mewn parau ac mewn grwpiau amrywiol eu maint gyda neu heb arweiniad oedolyn.

Y peth pwysicaf i'w nodi yw bod plentyn yn mwynhau chwarae ac yn dysgu heb fod yn ymwybodol ei fod yn cael ei addysgu. Mae plentyn yn dysgu trwy ymwneud prysur. Caiff eich plentyn ei annog i chwarae, i archwilio a dysgu yn ei amser ei hun. Rydyn ni'n cynnig amser, lle, defnyddiau ac offer mewn man lle gall deimlo'n hapus a diogel. Bydd eich plentyn yn datblygu hunanhyder ac annibyniaeth wrth gael ei annog i wneud gymaint ag sy'n bosib dros ei hun.

Yn ystod bob sesiwn, bydd amser i archwilio yn annibynnol, i wrando ar storïau, i archwilio cerddoriaeth a symudiadau, i baentio, i ddarlunio, i ysgrifennu, i greu, i adeiladu, i goginio, i chwarae y tu allan, i ddefnyddio llyfrau, i rannu, i siarad a gwrandao ar eraill, i gymryd rhan mewn chwarae dychmygol, i chwarae a theganau bychain a mawr sef trenau, ceir, tai doliau ac ati. Byddant yn cael eu hannog i sylwi ar y byd o'u cwmpas, y tywydd a'r tymhorau, i edrych ar ôl pethau byw ac i ddefnyddio technoleg.

Cofiwch, bydd eich plentyn wedi dysgu llawer mwy nag a glywch amdano ganddo/i !

Cymdeithas Rieni:

Mae Cymdeithas Rieni lewyrchus iawn yma yn Ysgol Llanystumdwy. Bydd y rhieni yn cydweithio yn dda gyda'u gilydd er mwyn codi arian ar gyfer adnoddau a gofynion eich plant. Mae croeso mawr i chwi ymuno ar gymdeithas a bydd llythyr gan yr ysgrifenyddes i'ch hysbysu pryd fydd y cyfarfod. Gall fod yn deimlad rhyfedd mynd i gyfarfod ble mae llawer yn adnabod eu gilydd eisioes, ond cofiwch bod pawb yno er budd y plant a bod pawb yn falch iawn o weld aelodau newydd sy'n awyddus i helpu.